



APN – Aalisarnermut Piniarnermullu Naalakkersuisoqarfik  
Postboks 269  
3900 Nuuk

Email.: [apn@nanoq.gl](mailto:apn@nanoq.gl)

Allaffeqarfik/Head  
Office:  
Aqqusinersuaq 31, 1. Sal  
P.O. Box 386  
3900 Nuuk

Tlf.: +299 32 24 22  
Fax: +299 32 57

Email: [knapk@knapk.gl](mailto:knapk@knapk.gl)  
Homepage:  
[www.knapk.gl](http://www.knapk.gl)

Ulloq, 29.10.2024  
J.nr.11.02.02

Pineqarpoq: 2025-imut qilalukkanut qaqortanut aamma qernertanut pisassiissutit pillugit tusarniummut KNAPK-miit akissuteqaat.

### **KNAPK-miit tusarniutigineqartut pillugit imaattumik akissuteqassaagut:**

2025-imi pisassatut Naalakkersuisuniit siunnersuutigineqartuni qilalukkanut qaqortanut pisassiissutissat 2024-imut naleqqiullugu allannguuteqartinneqanngillat. KNAPK-miit qaqortanik pisassiissutit allannguuteqarterusuppagut, tassa Kalaallit Nunatta kangianut ataatsimoortumik qaqortanik ukiut tamaasa 20-inik pisassiisoqartarnissaa piumasarigatsigu, taamatullu qernertanik pisassiiviusartut pisassiissutaasartullu naleqqussarneqarnissaat piumasaralutigu.

Tamatumani tunngavilersuutigalutigu nunatta kangiani piniartut ukiorpassuit ingerlaneranni qilalukkanik qaqortanik takujuartarsimammata killilersuisoqanngikkallarmallu pisarisarsimallugit. Ilisimatuut nunatta kangianiitillutik qilalukkanik qaqortanik takusaqartannginnerat kangianut pisassiisoqartannginneranut tunngavilersuutigineqartarpoq, piniartummi nammineerlutik ukioq kaajallallugu piffinni piniartuartsut nalunaarutaat pingartinneqartariaqarput aalajangersaasarnermilu atorneqartariaqarlutik.

Ukioq manna Nunatta kangiani qilalukkat qernertarpasuit takuneqartarput soorlu kangerlusuarmi Tasiilap Ittoqqortoormiillu akornnanni qilalukkat aatsaat taama amerlatigisut piniartunit takuneqarsimapput aammalu setembarimi Ittoqqortoormiit Kangerlussuanut qilalugarparujussuit takussimallutik. Nunatta kangiani Piniartut ilisimalikkaminnik oqariartuutaat imaannaanngillat tassa ilisimatuut Kalaallit Nunatsinni Pinngortitaleriffimmiit ukioq manna NAMMCO-mut saqqummiunneqarpoq Kalaallit Nunaatagoq kangiani (Tunami) qilaluaqanngilaq. (Ajrpoq)

Aammalu ukiuni kingullerni avanaani Qaanaap Upernaviullu eqqaanni qilalukkat qernertat amerlavallaalerlutik qalerallinniarnermi (Aalisarnermi) aalisarfinni akornutaanerat annertusiartorpoq, allaat aasaq manna Upernaviup eqqaanni qaleraleqarfiit ilaat soorlu Aappilattup kanga qernertat arfineq pingasut (8) qimassanagu neriniarfiguarsimallugu.

*Qilalukkat arferillu mikinerit allat aalisagartortorujussuupput, soorlu aamma arferit anginerit aalisagaaqqanik nerisorujussuusartut, taamaattumik nunatta sineriaani qilalukkat amerlavallaalinnginnissaat sulissutigiuartariqarparput, ukioq manna Upernaviup eqqaanni aamma nunaqarfiup aappilattup kangiani qernertat qalerallinnianut annertuumik akornutaapput, pisassaqqannginnamilli pisarisinnaannagit. Nunatsinnimi aalisakkat kisiisa aningaasaqarnikkut nappatigaavut, taamaammat Aalisartut qilalukkanit akornusersorneqartualernerat susinnaanagillu akuerineqarsinnanngilaq.*

Tamakku tamaasa eqqarsaatigalugit KNAPK-miit Naalakkersuisunnut kaammattuutigaarput Kalaallit Nunatsinni qilalukkanik pisassiissutaasartut ingerlareersut attornagit **kulturikkut**

**pisassiissutunik taasanik** (nutaanik killilersuiffiunngitsunik) pilerserteqqullugit qaannamik naaleqqaarlugit piniarneqartartussanik. Ukiukullu sikup sinaani qimussimik piniarnermi pisarineqarsinnaasunik.

Qaanaami qaannamik piniartarneq atornerqarpoq, tassa qilalugaq naaleqqaarlugu toqunneqartarluni, taamatut piniartarneq ingerlalluarpoq kusanarlunilu. Taamaammat naammattunik pisassaquartuarnissaat qulakkeersimasariaqarpoq. Taamatullu qimusseriarsuarimi ukiut tamaasa qaannamik piniagassanik pisassiisoqartarnissaa pisariaqarpoq qularnanngitsumik nunatta sinneranut immikkut qaannamik piniagassanik pisassiisoqartalersinnaalluni.

Ukiut ilaanni Nunatsinni qilalugartassat nugunneqanngitsoortarneranut pissutaasarpog, ukiut arlaanni issittumi pinngortitarsuaq sakkortoorsuusarmat, issittorsuulluni, taartorsuulluni anorlertartorsuullunilu inuinnannguanut imaalitsiaannaq akiorneqarsinnaanani. Taamatut atugassaqartarnitsinnut takussutissat ersarinnersaraat nunatta kitaata avannaarsuani Qaanaami innuttaasut atugaat aammalu nunatta kangiaata avannaani Ittoqqortoormiini innuttaasut atugarisartagaat. Taakunani takuneqarsinnaavoq pinngortitarsuaq inunnguit taakkunani najugaqartut inuunarnerannut qanoq sunniuteqartartigisoq.

Kalaallit Nunarput tamakkerlugu qilalukkanik qaqortanik qernertanillu piniartut suleqatigalugit kisitsisarnerit ukiut akulikinnerusut atorlugit ingerlanneqartarnissaat Naalakkersuisut pilersaarusiorluugaasumik ingerlattariaqarpaat aamma ukiup ingerlanerani sineriapput tamakkerlugu Piniartut namminneerlutik pisaminnik **takusimasaminnillu** nalunaarusiortarneri nalunaarusiortarnissaallu atorluarlugit.

*Nunatsinni innuttaasut neqissaqarniarnerannut qilalugamernit tapertaalluarnissaat anguniarlugu qilaluaminernik mattannik, neqinik, sarpiminernik il.il. nioqqutissiornissamat perarfissiilluarnissaq Naalakkersuisut aqutissiutissagaat inassutigineqarpoq.*

*Kalaallit Nunatsinni piniakkat suogaluartulluunniit killilersorneqartillugit Inuussutissarsuitigalugu piniarnermut allagartallit kisimik piniarsinnaatitaasarnissaat KNAPK-miit sakkortuumik Naalakkersuisunut inassutigaarput. Tamanna minnerunngitsumik atuuppoq qaqortanik qernertanillu piniarsinnaatitaassagaanni.*

#### **Qilalukkat qaqortat:**

- *KNAPK-miit Naalakkersuisunut kaammattuutigaarput qaqortanik qilalugartassanik ukiuni tulleriiaani ikiliartortitsisoqassanngitsoq.*
- *Nunatta Kangianut ataatsimoortumik ukiut tamaasa qaqortanik 20-inik pisassiisoqartalissasoq.*
- *Qaanaaq immikkut pisassiiviujunnaarlugu nunatta kitaanut ilanngutiinnarneqassasoq, qaanaamut immikkut pisassiissutaasut 29-it kitaanut pisassiissutinnut ilanngutiinnarlugit. Kitaanut pisassiissutit 294-sinngorlugit.*
- *Ukiumi pisassanik pisarinngitsuugaqartillugu agguaaqqinnermi pisarinngitsuukkat pisarineqarnissaat qulakkeerniarlugu agguaaqqikkasuaasarnissaq isumagineqartassasoq, soorlu tikaagullinnut taamaasiortalersugut.*

#### **Qilalukkat qernertat:**

- *KNAPK-miit Naalakkersuisunut kaammattuutigaarput qernertanik qilalugartassanik ukiuni tulleriiaani ikiliartortitsisoqassanngitsoq.*
- *Qaanaami inuusuttut qaannamik qilalugarniartalersinnaat anguniarlugu ilinniartitsisarlernissaq Naalakkersuisut immikkut sulissutigissagaat KNAPK-miit piumasaraarput.*
- *Etah Savissivillu Pisassiivik Qaanaamut ilanngunneqartalissasut, taamaallilluni taakkununnga pisassiissutaasut ataatsimoortillugit piniarneqarsinnaalersillugit.*
- *Ittoqqortoormiunut pisassiissutit 17-usut 40-inut amerlassusileqqunearput Ittoqqortoormiini aalisarnermik inuussutissarsiortoqanngimmat piniarnerinavimmik inuus-*

*sutissarsiortoqarmat aammalu ukioq manna aatsaat taama qilalukkat amerlatigisut Nunatta kangiani (septembarimi) piniartumiit takuneqartarmata. .*

- *Tasiilamut pisassiisutit 8-sut 20-inut amerlineqarnissaat piumasarineqarpoq.*
- *Upernaviup eqqaanilu qernertat amerlavallaalerlutik aalisarnermut akornutaalerpallaarnerat pissutigalugu Upernavimmut eqqaanullu qernertanik pisassiissutaasartut Uummannamisut amerlassusilerneqassasut.*
- *Ilulissanut pisassiissutit 15-usut 25-inut amerleqquneqarput.*
- *Qasigiannuanut pisassiissutit 10-usut 25-inut amerleqquneqarput.*
- *Kangaatsiamut pisassiisutit 10-sut 25-inut amerleqquneqarput.*
- *Qilalugaqatigiit assigiinngitsut amerliartormata Sisimiut Maniitsullu ataatsimut pisassiivinngortinissaat piumasarineqarpoq 2025-imullu 20-inik pisassillugit.*
- *Nuummiik kujammut Nanortalimmut pisassiissutit 10-nut amerleqquneqarput, qilalukkat qernertat takussaalerluttuinnarmata.*
- *Saniatigooralugu pinialuttartunut pisassiissutit 10-inik pisassinneqartarnerat KNAPK-miit isumaqatigineqanngilaq, sulisartut aningaasarsioreersut pisassinneqartarmata piniartunik ingiarsaarisussanngorlugit.*
- *Pisassanik amerlassusilersuisarnermi Piniartut ilisimasaasa atorineqartarnissaat KNAPK-miit piumasareqqipparput.*
- *Ukiumi pisassanik pisarinngitsuugaqartillugu agguaaqqinnermi pisarinngitsuukkat pisarineqarnissaat qulakkeerniarlugu agguaaqqikkasuaasarnissaq isumagineqartasasooq, soorlu tikaagullinnut taamaasiortalersugut.*
- *KNAPK-miit ilanngullugu kaammattuutigaarput siunissami qilalukkanik pisassiisarnermi Kommuunitoqqat aallaavigalugit pisassiisoqartalernissaa aaqqissuunneqasasooq, taamaaliornikkut innuttaasut amerlanerpaat ilageeqataasarnissaat anguneqarsinnaammat.*

Naggataatigut - Tamakku tamaasa eqqarsaatigalugit KNAPK-miit Naalackersuisunnut kaammattuutigaarput Kalaallit Nunatsinni qilalukkanik pisassiissutaasartut ingerlareersut attornagit **kulturikkut pisassiissutinik taasanik** (nutaanik killilersuiffiunngitsunik) pilerserteqqullugit qaannamik naaleqqaarlugit piniarneqartartussanik. Ukiukullu sikup sinaani qimussimik piniarnermi pisarineqarsinnaasunik.

Immikkoortortaqarfitta akissuteqataat immikkut ilanngullugit nassiunneqarput.

Inussiarnersumik inuulluaqqusillunga  
***Piniarneq pillugu Siunnersuisoqatigiit***  
Sinnerlugu

**Henning Dalager**  
Siulittaasoq